

Codex Laureshamensis Teil: Bd. 1, Einleitung, Regesten, Chronik Nr. 95

In nomine sanctae et individuae trinitatis. Ego Henricus divina favente clementia, Romanorum imperator augustus. Notum facio omnibus sanctae dei aecclesiae fidelibus, tam presentibus quam et futuris, qualiter assidua proclamatio nostras aures inquietabat, ob inveteratas et frequentes contentiones, et ob inmarcidas inimicitias, quae semper erant inter wormatiensem episcopum et laureshamensem abbatem, et inter familias utrarumque aecclesiarum quae iam in tantum convaluerunt, ut etiam innumerabilia inter se fierent homicidia, et in hoc maximum detrimentum utraque pateretur aecclesia. Quapropter cum consilio meorum fidelium id ordinare disposui, quomodo tantae discordiae temerariam presurationem inter utramque aecclesiam, et earum familias, nunc et inposterum aut omnino dissoluerem, aut inpunitam non relinquerem. Inprimis precepi, et ad hoc peragendum meos nuncios misi, ut omnis iniustitia quae iam per multa tempora ex utraque parte incorrecta remanserat, ab aduocatis illorum utrimque pleniter corrigeretur, et dehinc preuideant, ne talia apud illos sic inueterescant. Et si aliqua noua contentio inter illos exorta fuerit, uolo ut conueniant, et quam citissime possint corrigant. Et ne talis ac tantae seditionis audacia, sine digna ultione inter utrasque familias post remaneret, per huius cartulae preceptum, istud constitui decretum. Si quis ex familia sancti Petri wormatiensis, aliquem ex familia sancti Nazarii, vel econtrario aliquis ex familia sancti Nazarii, quemquam seruorum sancti Petri insequitur, et ausu temerario et armata manu aliquem ad occidendum, vel ad depredandum eius curtem, siue eius domum infregerit, et eum impugnauerit, et si ille aut aufugerit, vel quoquo modo ab eius potestate siue impugnatione se liberaverit, aut si forte domi non fuerit, illi qui huius audaciae et inuasionis dux | et princeps fuerit, tollantur capilli et corium, et insuper in utraque maxilla ferro ad hoc facto, etiam candenti bene gretetur et comburatur. Reliqui eius sequaces, cute et capillis priuentur. Si autem ibi occiditur, omnes qui huius homicidii vel inuasionis participes sunt, cute et capillis perditis, supradicta combustionem signentur, ac werigeldum occisi domino suo auctor homicidii persolvat, et cum proximis eiusdem interfecti reconciliationem faciat. Et in quocumque loco aliquis ex utraque familia ab utrisque innocens occiditur, homicida supradictae sententiae subiaceat. Hanc uindictam, et istud meum constitutum, aduocatus in cuius aduocatione hoc euenerit cum scientia episcopi et abbatis in presentia nunciorum utrorumque fideliter adimpleat. Si uero aduocatus aut mercede conductus, aut gratia commotus, aliqua calliditate hec decreta auertere voluerit, gratia nostra et aduocatione carebit, nisi super sacras reliquias hoc iurare audebit, quod eum qui homicidii seu inuasionis illius reus est, nusquam acquirere possit; tamen quam citissime poterit acquirat. Et si homicida ex familia episcopi est, et aduocatus eum acquirere non potuerit vel noluerit, fideles abbatis si possint illum acquirant, et ad predictam paenam presentibus nunciis utrorumque representent. Similiter fiat ex parte episcopi. Et de seruientibus episcopi et abbatis illud constitvimus, ut si quis illorum tale aliquid fecerit, predictae penae subiaceat, vel decem libris denariorum redimatur. Vnum autem est quod uolo, iubeo, et firmiter precipio, ut rem semel bene ac recte definitam, nullus iterare vel renouare audeat. Si autem predictus episcopus aut abbas hoc decretum annullare cupiat, michi vel meo successori duas libras auri persolvat, conatum tamen suum nequaquam perficiat. Et ut hec constitutio stabilis inconuulsaque permaneat, sigilli nostri impressione hanc cartam insigniri iussimus. Signum domni Henrici Romanorum inuictissimi imperatoris augusti M. Guntherius cancellarius uice Aribonis archicapellani recognoui. Data IIIa non. decem. Indict. VIa.

Anno dominicae incarnationis MoXXoIIIo. Anno domni Heinrichi secundi regnantis anno
XXoIIIo. Imperii autem Xo. Actum in Triburia regia uilla. Amen.